


# SLINGERVEL



**Junie/Julie 2017**

**Christelike maandblad vir die jeug**





Slingervel, Jaargang 58  
Nommer 989, Junie/Julie 2017

**A**s julle enige vrae het, iets wat jy nie verstaan nie, of oor iets wat in die Slingervel geskryf is, meer wil weet, is julle baie welkom om vir my  
⇒ 'n sms te stuur of te whatsapp na 084 551 2107,  
⇒ of 'n e-pos te stuur na [slingervel@gksa.co.za](mailto:slingervel@gksa.co.za),  
⇒ of 'n brief te stuur na Posbus 88, Bloemhof 2660



## in hierdie uitgawe ...

- 3 Redakteursbrief
- 4 Verjaardaghoekie Junie
- 8 Susanna die slavin (1)
- 10 Daniël 2 – Blokkiesraaisel
- 12 Doolhof – Genesis 24
- 14 Die kuier by Oupa en Ouma
- 16 Waar om vir grondwater te boor (2)
- 18 Reformasie 1550
- 20 Verjaardaghoekie Julie
- 23 Doolhof – Oplossing
- 24 Susanna die slavin (2)
- 26 Daniël 2 – Woordsoek
- 27 Inkleurprent – Genesis 24
- 28 Blokkiesraaisel – Oplossing  
Woordsoek – Oplossing
- 29 Fokus: Breëkoparend
- 30 Wat kan ek lees?
- 32 Wat kan ek doen? Ontbytnessies

<p>REDAKTEUR Dr. Hennie van Wyk e-pos: <a href="mailto:hennie@gksa.co.za">hennie@gksa.co.za</a></p> <p>Tipografie en uitleg Joey Fourie e-pos: <a href="mailto:kerkblad@gksa.co.za">kerkblad@gksa.co.za</a></p> <p>MEDEWERKERS Riana Jonker Susan Lourens Oom Hennie Oom Attie Venter Ina Gouws</p> <p>Eienaars en uitgewers Deputate vir Kerklike Tydskrifte Gereformeerde Kerke in Suid-Afrika Posbus 20008, Noordbrug 2522</p> <p>Drukkers V &amp; R Drukkery Tel. 012 333 2462</p>	<p>Intekening Administratiewe Buro Afdeling Publikasies Posbus 20008, Noordbrug 2522 Tel: 018 297 3986</p> <p>Intekengeld R255,00 per jaar (posgeld en BTW ingesluit) (Sien die intekenvorm op bl. 8 vir meer inligting oor intekengeld.)</p> <p>Die Redakteur Bydraes en briewe Posbus 20008 Noordbrug, 2522</p> <p>Jaargang 58, Nommer 989, Junie/Julie 2017 ISSN 0037 685 X</p>
--	--





# Reformasie 1550

Maats,

Julle sal onthou dat ek geskryf het dat die woord "Reformasie" uit twee Latynse woorde bestaan: "Re" wat "weer" beteken, en "forma" wat "vorm" beteken. Die Reformasie wou weer die kerk vorm soos God dit bedoel het, nie soos die mense - die Rooms-Katolieke Kerk - dit gemaak het nie.

In die jaar 1520 was daar basies drie groot kerke:

- In Wes-Europa die Rooms-Katolieke Kerk.
- In Oos-Europa die Grieks-Ortodokse Kerk (die Ortodokse kerke en die Rooms-Katolieke Kerk het in 1504 geskei oor die vraag of die Heilige Gees ook deur Jesus gestuur word).
- In die Arabiese lande en Noord-Afrika die Islam.

Toe Maarten Luther in 1517 sy 95 stellings teen die kerk deur van Wittenberg vasgespyker het, het hy nie 'n eie kerk gestig nie. Hy het net gevra dat die kerk, die Rooms-Katolieke Kerk, na die Bybelse waarhede terugkeer.

Die hartseer is dat die Rooms-Katolieke Kerk glad nie daarin belanggestel het nie! Hulle het Luther uit die kerk verban en wou hom doodmaak. Dit was eers in 1521 dat die Lutherse Kerk ontstaan het.

In die volgende 30 jaar het mense oral Luther se werke gelees en veral weer begin om die Bybel te bestudeer. Nie almal het met Luther saamgestem nie, en het ander afleidings uit die Bybel gemaak.

Ons moet ook onthou dat die konings en keisers 'n baie groot invloed op die Reformasie gehad het. In die Maart-uitgawe het ek geskryf oor Hendrik VIII wat as koning van Engeland met die Rooms-Katolieke

Kerk gebreek het. So het keiser Frederik Luther teen die Katolieke vervolging beskerm. Baie keer is die Reformasie deur die regering van 'n land aangemoedig of verhoed.

Ek het 'n interessante kaart op die Internet gekry (<https://hbdchick.wordpress.com/tag/protestant-reformation/>). Hier word aangedui hoe die godsdienste in die verskillende lande in die jaar 1550 gelyk het. Lees nou 'n kort opsomming van die Reformasie en vul op die kaart in watter kleur watter denke/kerke voorstel. (Die oplossing is op bl. 19)







# Wat kan ek lees?

Watt, Fiona. 2016. *Protea se buitenste ruimte plakkerboek*. Geïllustreer deur Paul Nicholls. Pretoria: Protea Boekhuis. [34 p., asook 10 p. plakkers]. Prys: R120,00. ISBN: 978-1-4853-0736-5.

Hierdie interaktiewe prentboek beloof om ure se pret vir lesers vanaf 5 jaar en ouer te verskaf. 'n Hele aantal onderwerpe word kortliks bespreek en geïllustreer, soos 'n bekendstelling aan die buitenste ruimte en sy inhoud van sterre en planete; 'n bietjie ruimtevaartsgeskiedenis; wat ruimtereisigers se opleiding behels; hoe 'n ruimtetuig lyk en gelanseer word; en hoe 'n ruimtestasie of maanbasis lyk; en nog vele meer.

Vir elke bladsy is daar agterin die boek 'n plakkervel met 'n totaal van meer as 250 plakkers waarmee die teksbladsye voltooi en versier kan word. Nuuskierige en potensiële ruimtevaarders sal hierdie plakkerboek terdeë geniet en baie leersaam vind.

In die pers aankondiging word gestel: "Dit is 'n kreatiewe en opwindende boek van die Britse uitgewershuis Usborne wat Protea Boekhuis in Afrikaans vertaal en aan 'n Suid-Afrikaans mark bekendstel."



Donaldson, Julia. 2016. *Vos se sokkies*. Illustrasies deur Axel Scheffler en rymvertaling deur Philip de Vos. Pretoria: Protea Boekhuis. Prys: R130,00. ISBN: 978-1-4853-0712-9. (Stories uit die Eikewoud-reeks.)

Vos wil aantrek, maar sy sokkies is weg. Hy voel mistroostig en kry koud en soek oral na sy sokkies. Op elke plek wat hy soek, vind hy gelukkig 'n kledingstuk wat hy kan aantrek. So word hy gelukkig warmer – maar sy voete bly egter koud! Sal hy ooit sy sokkies weer kry?

Hierdie kartonprentboek sal baie pret en die plesier van saamontdek aan jong lesertjies verskaf. Saam met Vos kan hulle opgewonde raak oor elke vonds en sien hoe Vos se uitrusting vir die dag begin vorm aanneem.


Die kleurillustrasies en ophig-flappies dra by tot groot genot en ure se pret!

Beyers-Boshoff, C.F. 2016. *Jasper die atleet*. 2e uitg. Pretoria: Protea Boekhuis. 95 p. Prys 125,00. ISBN: 978-1-4853-0384-8. (Jasper-reeks, 6.)

Toe die nuwe atletiekseisoen begin, was Jasper vuur en vlam om groot hoogtes te bereik. Hy wou hard oefen om vir die span gekies te word wat in Kaapstad teen ander provinsies sou meeding. Daar was egter iets wat sy droom kon kelder – die feit dat hy nie spykerskoene besit het nie!

Hy en die Viermanskap het allerlei planne gemaak, soms amper met ramspoedige gevolge, maar sonder sukses op spykerskoene! Gelukkig het Jasper se oom Louis in die prentjie gekom om met planne en afrigting te help. Hy was immers op sy dag 'n Springbokatleet!

Lees hierdie spannende aflewering in die reeks om ook die spanning te





ervaar om te sien of Jasper wel sy droom gaan verwesenlik en ook hoe hy in die nasionale kompetisie sou vaar. Die reeks behoort jong lesers, veral seuns, nog steeds te boei net soos dit in hulle ouers se jongdae hulle vir ure aan die lees en geïnteresseerd kon hou. Kom, word deel van die opwindende Jasper-leserskring!

**Jacobs Jaco & Viljoen, Fanie (samests.). 2016. Die wonderwêreld van roofdiere. Pretoria: LAPA-Uitgewers. 48 p. Prys: R60,00. ISBN: 978 0 7993-7898 6. (Hoezit!-reeks.)**

In hierdie interessante feiteboek met sy duidelike kleurfoto's word 'n magdom interessante feite oor 'n groot verskeidenheid roofdiere gegee. Die feite word kripties en boeiend aangebied en sal lesers se belangstelling prikkel om meer oor die onderskeie roofdiere op te lees. Sommige van die roofdiere waarvoor inligting verskaf word, is landdiere soos leeus, luiperds, rooikatte en die oselot, tiere en jagluiperds. Daar is ook talle see- en waterdiere soos haaie, tiervisse, payara's en pirannas. Roofdiere sluit ook 'n magdom roofvoëls (arende, uile en nog meer), asook spinnekoppe, kewers, skerpioene, krokodille en slange in.

Die voedselketting word op 'n eenvoudige wyse verduidelik en interessante gedrag, kamoeflering, sintuie en aanvalswapens van die verskeie roofdiere word boeiende meegedeel. Tussendeur is allerlei vet pret-aksies in die vorm van aktiwiteitsblaaie met speletjies en kopkrappers ingevleg.

Soos die ander boeke in die Hoezit!-reeks word ook hierdie aflewering boeiend en met humoristiese taalgebruik in die kenmerkende Jaco Jacobs en Fanie Viljoen-styl aangebied. Op die agterblad word die volgende lokvrae gestel: *Hoeveel tande het 'n witdoodshaai?*; *Hoe kry uile dit reg om snags hul prooi te jag?*; *Wie spog met die kragtigste kake in die diereryk?* en *Watter roofvoël kan so vinnig soos 'n Formule 1-renmotor op sy prooi afpyl?*

**Schmidt, Annie M.G. 2016. Jip en Janneke. Illustrasies deur Fiep Westendorp & uit Nederlands vertaal deur Amelia de Vaal. Pretoria: Protea Boekhuis. 352 p. Prys: R295,00. ISBN: 978-1-4853-0227-8.**

Jip en Janneke is twee skattige kleuters – hulle is bure, beste maats, baklei soms, maar meestal doen hulle pretdinge en kattedwaad saam. Jenneke het 'n kat, Siepke, wat elke dan en wan kleintjies kry en waarvoor albei gaande is. Janneke se pop, Poppejans, is dikwels die onderwerp van menige van hulle speletjies en avonture. Daar is natuurlik ook nog Takkie, hulle gesamentlike worshondjie, waarvoor albei gek is.

In hierdie omnibus van Annie M.G. Schmidt se Jip en Janneke-stories leer die lesers die karaktertjies behoorlik ken en hulle klim diep in 'n mens se hart in. Die twee het 'n ryk verbeelding en kan gewone meubels in 'n vliegtuig, 'n boot, 'n sirkustent of enigets anders omskep.

Hulle is ook planmakers – om genoeg geld vir 'n verjaardagsgesent te kry, om saam na Sinterklaas te gaan soek, of om vir mekaar verrassingskaartjies uit te soek en te pos. Aan hulle vindingrykheid is daar geen einde nie.

Lesers, oud en jonk, sal die verhaaltjies in die omnibus baie geniet en skaterlag oor al hulle mannewales en kaskenades. Jip en Janneke-verhale is baie geliefd in Nederland. Die Afrikaanse vertaling is egter uitstekend gedoen en die feit dat die kultuur effens anders is as dié van die Afrikaanse lesers, pla geensins.

Hierdie omnibus is ideaal vir voorlees, selflees en herlees en sal gou 'n gunsteling in kinders se boekery word. Die eenvoudige ikoniese swart en wit illustrasies is treffend en help om die humor in die stories te verhoog. <sup>sv</sup>

